

rachetez moult chierement et tous porvoit moult bonnement et guerredonnera loyaument ceuls et qui auront l'ame l'un autre loyaument.

La quinte reson est pour ce que nous sommes tous compaignons en l'Ost nostre Seigneur, et ses chevaliers et ses soudoiers, a qui tous donne un meisme loier. C'est la gloire pardurable ou l'onneur et la gloire confermee, qui ci sera bien commandee.

La sizime reson est pour ce que nous vivons tous d'un esperit espirituelment, aussi comme nous vivons tous d'un air corporelment. Par cest esperit nous sommes tous filz de Dieu par adoption, c'est par avoerie, et fils de sainte Eglise, frere germain de pere et de mere par vraie fraternité espirituelle qui tant vaut miex de la fraternité charnele comme l'esperit vaut miex que le cors.

La septisme reson si est pour ce que nous sommes tous membres du cors dont Jhesucrist est chief, et nous sommes les membres qui tuit vivons d'une meisme viande, c'est de sa sainte char et de son precieus sanc qui tant nous aime et tant nous tient chiers que il nous donne son sanc a boire et sa char a mengier. Pour nous ramentoit si souvent saint Pol ceste amour que nous voions, car bele reson ne bele essample ne vous puet il moustrar de vraie amour. Se tu veus bien penser a ces sept resons tu

trouveras sept degréz qui muevent du don de pitié.

Comment nous devons deporter li un l'autre

De cest arbre naissent sept branches, car ceste vertu se moustre en sept manieres, aussi comme l'en cognoist les membres du cors par les offices que chascun membre a.

Premierement l'un membre deporte l'autre qui ne li fait ne moleste ne dommage. A ce entendons nous l'innocence que nous devons garder li uns vers l'autre, car cest commandement doit estre escript ou cuer de chascun, et que tu ne faces autre chose que tu voudroies que l'en te feist, ne que ta main destre feroit a tan senestre. Après, l'un membre quoi que il face a l'autre, le sueffre doucement, ne point ne se revenge, ne nul mouvement d'ire, ne sueffre l'un de l'autre, ne ne murmure. En ce entendons nous parfaite debonaireté, qui a trois degréz. Le premier si est que l'en ne se courouce point, le secont que l'en ire pas longuement, le tiers que l'en ne porte nul mouvement d'ire ne de hayne envers son proisme pour riens que l'en li face. Après tous les membres obeissent a leur souverain, car il font tout ce que le cuer commande et les yex leur moustrent et enseignent. Et en ce entendons nous la vertu d'obedience, dont nous avons devant parlé, qui doit estre appareillié en amour et en charité. Après, l'un membre sert et aide a

l'autre sans dangier et sanz contredit. Et en ce enten-
dons nous la vertu de la charité. Adonc un homme quant il
aide aus autres du pooir que il a, ou li conseille et en-
seigne du sens que il a, donc dit l'en que il est moult
charitables; et aussi nous commande saint Pierre les granes
que Diex nous a prestés que nous amenistrons a nos prieres.
Donec Tulles li philosophes dit, "Nous devons sentir quanque
ou monde a, car tout est fait pour homme servir les hommes,
pour aider les uns aus autres sont engendrés. "Feson donc,"
dist il, "ce pour quoy nous sommes nez et que nature nous
enseigne, et queron tuit le commun profit"; car si comme dit
Job, nous sommes membres d'un cors. Après touz les membres
sentent et traient a eulz ce que l'en fait a chascun, soit
bien, soit mal, soit joie, soit angoisse. Quant l'en fier
le pié, la bouche dit, "Nous me bleciez"; par ce entendons
nous la vertu de vrai pitié que nous devons avoir commune-
ment. Qui a deus offices, si comme dit saint Pol, doit con-
joir as biens que les autres ont et font, et douloir les
maus que les autres ont et sentent. Après, se l'un membre
est navré, tous les autres li aident a ce que il soit gue-
ris. En ce entendons nous la vertu de justice, sanz la-
quelle le cors de sainte Eglise ne porroit vivre, car les
membres porris honniront les sains. Qui puet donques sa-
voir comment l'en porroit son frere chastier, ou son proisme

ou son sougiet reprendre ou pugnir, prende garde a soi.

Quant un de nos membres est malades et navrez, grant pitié en a nostre cuer et grant douleur en sent, et par la grant amour que il a a li si y met la main moult doucement; et si comme dit Seneques, aussi comme du cors, aussi du cuer doit l'en doucement retraitier les plaies, car de amour et de grant compassion doit estre la la correption, et o grant pleur y doit l'en la main mettre. Premiers y doit l'en les oingnemens mettre et les emplastres de douces amonitions; après, se ce ne vaut, les poudres aspres et poingnans de dures reprehensions; après, le fer de decepline; et se il ne fait s'empirier non, lors estuet venir l'espee pour dessevrer le ou par escommeniemement ou par banir hors du païs et esloingnier de soi. Après, les membres honneurent li uns l'autre et deportent, car si comme dit saint Pol, nous devons porter honneur li uns l'autre et reverence.

Et meismement ceus qui ont mestier de deporter, ce sont les plus fox et les plus febles, tous jours ceus doit l'en deporter. Et les sages si portent et deportent les fols et les febles tous jors; aussi comme les os portent la char et les pilers la meson, estre les mesdisans qui volentiers crient les maus et les defautes que il voient en autrui.

Aprés l'un membre deffent l'autre au besoing et se met pour li, car au besoing voit l'en qui amis est. Quant li uns

des piez glace, l'autre li aide tantost; et quant l'en
veut ferir le chief, la main se met au devant. En ce en-
tendons nous pure et parfaite amistié, dont nostre Sires
dit en l'Evangille que plus amistié ne puet estre que
mettre s'ame pour son ami. Cest amour nous moustre Jhesu-
cris, li loyaus amis, qui pour nous velt morir; et ce fist
il pour nous donner essample, si comme dit saint Pere. Et
saint Jehan dit que se Diex mist s'ame pour nous, et nous
devons nous mettre nos cors pour nos freres (c'est pour
nos proismes) se nous sommes a droit membre du cors dont
Jhesucrist est chief. Qui ceste vertu auroit, je direie
apertement que il seroit a droit boneurez. C'est la vertu
que nostre douz Mestre nous enseigne quant il dit, "Beneuré
sont li debonaire car il auront la terre des vivans."¹ Ore
entent bien cest boneurté que les debonaires ont en cest
siecle, car les parfaitement debonaires sont ja en
possession de la terre. C'est a entendre en trois manieres.
Premierement de la terre des vivans, c'est des sains et des
preudommes. Aussi comme la terre est habondant des bestes
et des hommes et pour ce que Diex, qui est la terre des
vivans et des debonaires, a en sa possession, car il ne font
riens fors ce que il plest a Dieu. Pour ce est drois que
il soient ses amis et que il aient Dieu en leur possession,
si comme dient li saint. Les debonaires auront, ce dient,

la terre en heritage, car saint Augustin si dit que nul
n'aura Dieu en possession s'il n'est avant en la seue.
Aprés, les debonaires ont ci la terre de leurs cuers en
possession, car il sont droitemeint seigneurs de leurs cuers
. . .² car ire et felonnie les mestrie. Les debonaires
mestroient les mauveses oevres et meurs; car miex vaut,
ce dit Salomon, cil qui mestroie bien son cuer que cil qui
prend a force chastiaus et citez. Aprés, les debonaires
sont seigneurs de la terre, c'est des biens terriens; car
se il les perdent, il en sont trouble et couroucié. Mes
cil qui s'en couroucent quant il les perdent n'en sont pas
seigneurs; ainz en sont sers . Et pour ce est il drois que
cil qui ont ci les biens temporels et espirituels et euls
meismes en possession, que il aient en la fin la terre des
vivans, c'est Dieu meismes en possession. Mes ore entent
et regarde que se Diex donne aus povres le ciel et aus
debonaires la terre, ou seront li aver et li felons fors
es tourmens d'enfer?

DU DON DE SCIENCE

Le premier don du Saint Esperitz fait home humble et cremeteus; le secont le fait dous et piteus; le tiers le fait cler et escienteus, sage et a mesure en toutes choses. Cest don, quant il descent ou cuer, si estrepe et giste hors de la racine le pechié d'ire et de felonnie qui trouble le cuer et fait homme tout forsené, si que il ne voit goute pour soi ne pour autre conduire. Mes cest don enlumine le cuer de toutes pars, si que il ne puet estre deceuz de nului. Aussi comme le don de pitié le fait innocent si que il ne veut decevoir nului, de quoi saint Jehan en l'Apocalipse dit,¹ vit en esperit que les sains hommes qui estoient plain de cestui esperit estoient tous plains de yex et devant et derriere. Et un autre . . .² moustra a Zacharie le prophete, une pierre ou estoient sept yex. Ce sont les sept yex que les preudes hommes ont car il voient cler et devant et derriere, et dedens leur cuer, et tout environ euls et a destre et a senestre. Cest don est le mestre de vertu d'omme, car il fet tout d'omme a point et a ligne. Il prent premierement son point et son bonne, et c'est ce que li Sages dit. "De quanque tu commenceras, regarde la fin et a quel chief tu en vendras."³ Aprés, il tent sa ligne, car il va avant par droite voie et par droite entencion, non pas comme le serpent ne comme

le gourpil. Après, il fait a ruille comme cil qui fait le mur onni et droit, car la commune vie des bons il hante sanz trouver nouveletez. Après, il esprueve souvent sa conscience a plon, car il prent garde que la tour ne pende, ne d'une part ne d'autre, ne ne s'encline a destre par prosperité et a senestre par adversité. Cest don est le prieur du cloistre de l'ame qui garde par tout primes ou cuer et puis es autres offices. En ces deus a quatre offices, l'entendement et la volenté, la reson et l'affection. Quant ces deus cotez s'accordent, il font moult douce melodie et moult biau service; c'est quanque volenté veut, quanque entendement enseigne de bien et affection ce que reson entent.

Ore entent bien de ces deus cotez qui sont en l'ame qui doivent a l'un costé a quatre services³ et en l'autre quatre. Car la reson si a quatre offices; c'est d'enquerre, de jugier, de remembrer, et de moustrer par parole ce qu'elle entent. Cest don enseigne la reson ce que elle doit enquerre et en quele maniere et en quel fin. Il en est moult grant mestier que il ne mespreigne si est moult grans griez. Il fait la reson reprendre et⁴ entendre que est necessaire et profitable et honneste, et la retraitier du contraire. Hé! Diex, comme l'en pert de temps et de despens pour aprendre choses qui noient ne valent fors a

vaine gloire et a pechié. Mes le Saint Esperit par cest don enseigne legierement et fait homme apprendre ordeneement et qui est neccesaire au salut de s'ame et qui plus maine a l'amour de Dieu, et tout ce fait faire a droite entencion et a droite fin. Ce est en l'onner de Dieu et pour le profit de s'ame et pour son proisme aidier. Aprés, il a reson de bien enquerre la verité des choses et meismement comment l'en doit croire et cognoistre sanz trop encherchier les conseuls de Dieu et la parfondesce de ses jugemens, la hautesce de sa majesté, la reson de ses sacremens bien croire. Et quant l'en croit ne trop ne tart ne a chascun ne a chascune ne a nului, car li uns et li autres si est vices, si comme dit Seneques.

Aprés de bien enquerre vient bien jugier. A bien jugier affiert que l'en n'affermi riens que l'en n'ait bien enquis et dont l'en ne soit certain que l'en ne s'entremette de jugier ce que a li n'appartient, si comme sont les choses repostes, les entencions des cuers, les choses que l'en ne puet tourner a destre et a senestre que l'en les entende bien et adez en la bonne partie dont cest esperit par cestui don fait la reson bien jugier et cognoistre a droit et distinter entre les bonnes choses et les mauveses, entre les grans maus et les meneurs, entre les petis biens et les greigneurs; car il fait chascune chose prisier

selonc sa droit value.

Aprés, il fait la reson remembrer que il ramenteit a homme quanque mestier li est, si comme il dit en l'Evangille. Les choses qui sont passees il fait entendre et regarder les choses qui a venir si fet pourveoir et ordener les choses presentes, et ce sont les parties de la vertu de prudence selonc le phylosophe.

Aprés il fait par mesure parler et taire, parler a envis, taire volentiers, si que la parole vieigne ançois a la luuete que a la langue et que elle soit pesee comme bonne monnoie et de bonne fourme. C'est en bonne maniere et en bonne entencion dite et que elle ait son droit pois et son droit nombre. Ce est que il n'i ait ne trop ne pou et que elle soit bien emploiee, car bonne parole ne bonne monnoie l'en ne doit mie pour noient donner.

Dont Diex dit en l'Evangille que nous ne getons mie nos precieus joiaus devant les pourciaus. Cils dons ordenne et acorde l'autre partie du cuer, c'est la volenté ou il a quatre parties; amour, paour, joie, et douleur. C'est que l'en ait ce que l'en doit et si comme l'en doit et tant comme l'en doit; que l'en n'ait joie ne delit fors en ce que l'en doit et tant comme l'en doit; que l'en crieme aussi ce que l'en doit et si comme l'en doit et tant comme l'en doit; et que l'en n'ait douleur fors de ce que

l'en doit et si comme l'en doit et tant comme l'en doit.
Quant ces quatre parties sont attrempees, adont dit l'en que li homs est attrempez; aussi comme l'en dit d'une racine ou d'une herbe que elle est attrempree quant elle n'est ne trop froite ne trop chaude ne trop seche ne trop moiste, et aussi comme au cors de l'omme viennent trop de maladis pour la desatrempace de ces quatre qualitez ou de ces humeurs, aussi en cuer d'omme viennent tuit li vice et tuit li pechié par la desatrempace de ces quatre humeurs. Quant ces deus cotez du cuer sunt acordé et ordéné, c'est la reson et la volenté, lors est li hons ordenez par dedenz soi. Ce sont li dui rasnel de la racine d'un moult bel arbre. C'est d'une moult bele vertu que l'en apele equité. Equité est proprement ce que l'en fet par droit juge-ment et loial, ne trop mol ne trop roide, sanz encliner ne vers une partie ne vers l'autre, quant l'en va ouniment et droit comme ligne, car equité n'est autre chose fors ounimenz, c'est equitez. Qui cest vertu a, il a bone juges et sages car il ne set riens qui ne soit tres bien enquis et examiné, si comme dit li bons juges. Donc li premiers degré de ceste vertu est que li hons soit droiz juges de son cuer meismes, car il doit entrer dedenz soi et regarder sa conscience et examiner ses pensees et ses volentez que eles sont bonnes ou malveses et tot ordener a les garder de

raison si que la volenté et la raison soient a un acort.

Car si comme dit saint Bernart, "Bertu n'est autre chose que li assentemenz de raison et de volenté," vient sanz contredit dire et fere et mettre a oevre ce que reson dit et moustre et enseigne.

Li secons degrez de ceste vertu n'est autre chose que li homs soit bons juges de son cuer meismes et tieigne droitemeint la ruille d'equité entre soi et ce qui est dessouz soi. Ce est son cors que il a en garde que il doit si norrir que il puisst servir et si descipliner et chastier que il vueille obeir que la reson doit estre aussi comme uns loyaus arbitres entre l'esperit et la char qui sont tous jours contraires qui doit garder le droit d'une partie et d'autre en tele maniere que li espe-
riz soit bons sires et li cors resoit bons serjans. Ore est il grant mestier de tenir en ceste partie partout equité et droite mesure en mengier et en boire et en vestir et en chaucier et en toutes les choses que li cors demande, car il s'encline moult souvent plus en trop que en pou. Aprés, il reconvient les cinq sens du cors bien conduire et gouverner par reson et par equité si que chascuns serve de son office sanz pechié et sanz mesprison, si comme les yex de regarder, les narilles de flerier, les oreilles de escouter, la bouche de parler, les mains et tout le cors

d'atouchier. Quant cinq sens sont bien gardez lors est li chastiaus bien asseür et bien fermez, car ce sont les portes, ce sont les fenestres par ou la mort entre souvent en la vie, si comme dit li prophetes.

Le tiers degré de ceste vertu est que li home soit bons juges et tiengne equité entre soi et ce qui est devant soi. Ce sont les choses temporeles qui destruisent souvent le cors et l'ame quant l'en s'i met trop, comme fait et font li aver et li couvoiteus et tuit cil qui aiment le monde qui ont si les cuers enlachiez dedens les roys⁵ au dyable, si comme dit saint Job. C'est aus plais es que-reles et es besoingnes foraines que a leurs cuers. Il ne pueent entrer ne leur vie ordener, dont avint que c'est voirs que Seneques li sages dit que par souspeçon nous tient et fourvoions, que des parties de l'ame chascuns pense et est soigneus, mes de la vie ordenner nuls n'i pense ne n'estudie. Ore est doncques moult grant mestier que l'en ne mette trop son cuer en ces choses foraines, car qui trop li met il chiet en cuers et en la couvoitise du monde qui est racine de tous vices, si comme nous avons pieça moustré.

Li quars degrez de ceste vertu est que li homs voie cler a sa destre, c'est que il preigne garde aus bons qui sont a son destre costé et que des bons et des sages il

preigne sens et essample. Mes en cestui costé convient tenir discretion et equité, car toutes les gens ne pueent pas aler un voie, ne tuit li bon ne tuit li sage n'ont mie une meisme grace, aussi comme li membre du cors n'ont mie un meisme office. Et de ce sont moult cuers novices deceuls, si comme dit li aucteurs des collations des sains peres qui traitent de la perfection des vertus, car quant il voient un homme bien parfait et moult profitant en un estat et en une grace, tantost il y beent et ressambler le vuelent. Et quant il revoient un autre qui est en un autre estat ou en autre grace et refait moult de biens, aussi y beent et querent aprés et ensemenent au tiers et au quart et a nul ne s'arrestent. Cil sont aussi comme li bons levriers qui est encore tous novices qui court aprés chascune beste qui li vient au devant et ne fait fors soi lasser et son temps perdre. De ce met Ysopes la fable du chienet et de l'asne qui vecit ce chienet qui toutes les fois que ses sires venoit a l'ostel il li courroit a l'encontre et li sailloit au col et li sires se rejouoit a li et li faisoit grant feste. Pensa sci li asnes: "Aussi deuisse je faire si m'amera me sires miex me detüst il amer et faire joie qui le serf qu'a ce chienet qui ne li sert de riens." Ne demoura gueres aprés que cis asnes vit son seigneur en la court si li saut et court a l'encontre et

li giete les piez au col et commence a rechenner forment. Li sergent qui ce virent coururent a bastons et aus leviers et batirent cel asne tant que assez fu si que de ce dont il cuidoit avoir honneur il ot honte et domage. Par tels fables souloit li sages hommes enseigner sa mesnie et par cest essample il leur moustroit que il ne devoient pas baer aus graces ou il ne pueent ataindre. Et ce meisme enseigne Salomon, "Fils," fait il, "ne lieve ja tes yex aus richeces," ce est aus graces ou tu ne pues avenir. Pour ce est il grant mestier de discretion que l'en voie en autrui pour prendre essample.

Aussi rest il grant mestier que li homs voie cler a sa senestre, et c'est li quins yex et li quins degrez, car il doit regarder les fols et les mauvés qui sont aussi comme a senestre, car il sont ou pieur costé. A ceuls doit l'en prendre garde premierement pour ce que l'en ait compassion, après pour ce que l'en fuie leur folie et leur perdition, si comme dit li sages Salomon qui dit, "Je passai," fait il, "par la vigne et par le champ au fol pereceus et vi que tout estoit plain d'espines et d'orties, et a cest essample je apris sens et pourveance." Car l'en seut dire que biau se chastie qui par autrui se chastie. Après pour ce que l'en aime plus Dieu par qui l'en est de tels pechiez quites, mes moult estuet en cestui garder equité et

discretion, car quant je voi le fol et le pecheur devant mes yex, je en doi avoir pitié et compassion en moy meismes et non mie faire gas ne derisions et moqueries d'euls. Je doi tous jours haïr le pechié et amer la personne, et moult m'estuet garder en mon cuer que je ne vueille nului dampner ne moi comparer a nului tant soit mauvés, car tel est huy mauvés qui sera demain bon et tel est huy bon qui sera demain mauvés. Après je me doi tant comme je puis sanz meffaire vers euls ploier et descendre en oevre, en fait, et en parole, pour euls gaaingnier a Dieu et retraire de pechié, car si comme dit Seneques et saint Grigoire, nous ne poons tous ceus qui sont cheüz relever se nous ne nous voulons comment que soit envers euls encliner.

Le sizieme degré de ceste vertu est le sizieme oeil que ont li preudonme. C'est que il voient cler par derrière les laz et les engins au dyable qui nous sont aussi comme au derriere, car li annemis nous voit et nous ne le veons goute nos anemis. Ce sont li dyable qui moult fort et sage et soutill et soignex de nous decevoir car il ne cessent onques jour ne nuit mes touz jours en aguet de nous decevoir par leur engins. Donc il usent en plus de mil manieres, et comme dit saint Greigoire, li deables voit moult soutillement l'estat de l'omme et sa maniere et sa complexion et a quel vice il est plus enclins ou par

nature ou par acoustumance, et de celle part il l'asaillent plus fort le sanguin de joliveté et de luxure, le flematique de gloutonnie et de peresce, le melencolieus de envie et de tristesce; et pour ce se doit chascun desfendre plus de cele part ou il voit que son hostel est plus foible et encontre celui vice plus combatre. Donc il voit que il est plus assailliz et entent bien que il ne mesprengne nuli car il est hardiz et engrez comme cil qui assailli son seigneur le filz Dé, Jehuscrist. "Sez tu," dit nostre Seigneur a Job, "en quante guises il se desguise?" Aussi comme s'il deüst dire, "Nul ne le set fors que je." Car si comme dit saint Denis, tuit li anges et li bon et li mauvés et tuit le esperit des hommes sont aussi comme un miroier ront. Tantost y voit l'en les empreintes toutes qui li viennent au devant, aussi fait li esperis de l'omme, soit en dormant, soit en veillant. Or pren donc un miroer et le met contre un autre. Tantost toutes les formes qui estoient en l'un tu le verras en l'autre. En tele maniere dit l'en que li dyables moustre l'ennemi a l'omme tiex fourmes et tel figures con il veult quant Diex li seuffre et l'omme les reçoit, donc tiex foiz est malgré sien quant a pensee ou a yimaginacion. Aussi comme maugré mien mes couvient veoir ou recevoir en la prunelle de l'ueil le forme de la chose qui li est au devant. Or est tres grant grace de

Dieu et tres grant don du Saint Esperit entendre bien touz les langages au dyable et connoistre toutes ses faces, car si comme dit saint Bernart trop est soutive chose et fort a distinter entre les pensees que li cuers enfants et celes que li anemis i plante, quant il vient comme compains ou comme marchant et il moustre les pechiez comme il sont pesant et delitable, legierement le puet l'en connoistre.

Mes quant il vient en guise d'ange et moustre pour . . .⁶ au mal, lors est la temptation plus fort. Et pour ce dit saint Jehan que l'en ne croie pas a touz les esperiz, mes que l'en les espreuve ainçois que l'en les reçoive si comme font cil qui ont leur confessenrs bonz et sainz hommes et sages et bien esprouvez en teles quereles a qui il mous-trent souvent et menu toutes les pensees qui au cuer⁷ leur viennent, et bonnes et males. Car si comme dit Salemon, "Beneñrez est cil qui touz jours se doute"; et ailleurs dit, "Fay par conseil quanke tu feras et après le cop point ne t'enrepentiras."

Le septisme degré est le septisme oil que il convient avoir. Ceste vertu c'est cil qui en haut regarde qui a Dieu devant soi, et de cestui dit volentier nostre Seigneur en l'Evangile, "Se tes oilz est simples et purs, tout ton cors iert cler et luissant; et se ton oil est ort et divers, ton cors iert ort et tenebreus." C'est a dire,

se l'entencion de ton cuer est pure et simple et auge avant droit voie comme ligne parmi touz ces degrez que nous avons nomez, toute la masse de ces oevres et de ces vertuz sera bele et clere et plesant a Dieu; et se l'entencion est torte ou ele est fourchie ou ele set reploiee arrieres comme fet li cerciaus, toute la consience i ert tenebreuse et la masse de vertuz. Car sanz droite entencion aumone devient pechié et vertu vice. L'entencion est simple quant li hons fet ses bonnes oevres droitemeint por Dieu. Elle est torte et boçue quant il les fait pour plaire au monde ou pour vaine gloire. Elle fourche en deus parties quant l'en bee d'une part et d'autre part au monde, mes elle retourne arriere du tout comme fait li cerchiaus quant li homs qui ert son propre preu en trestout quanques il fait. Or as tu oy ces sept⁸ degrez par ou cest arbre croist et monte en haut.

Les branches de cest arbre

Les branches de cest arbre sont les sept vertus principaus qui respondent¹ aus sept vices, si comme fait humilité contre orgueil, amistié contre envie, debonaireté contre felonnie, prouesce contre peresce, largesce contre avarice, chaasté contre luxure, sobrieté contre glotonnie. Ces sept vertus gardent et conduisent moult

droitemeint et seurement l'omme a Dieu et les garde et conduit bonnement et saintement li esperis de science qui les maine par la voie d'equité, comme dit Salomon, par laquelle voie discretion et reson qui sont les charretiers des vertus, comme dit saint Bernart, et les gouverneurs de la nef de l'ame les maine et conduit en tele maniere que elles ne fourvoient a destre ne a senestre et ainsi profitent et croissent et portent fruit a plenté. Pour ce dit que la vertu d'equité par discretion se moustre en toutes les oevres des autres vertus, et sanz ceste toute autre vertu pert le non de vertu et devient vice. Encore di je bien que en un autre sens ces sept vertus devant dites sont les branches d'equité et tuit li fruit de bonnes oevres qui d'elles naissent apertement a cest arbre. Ore entent bien comment li granz Mestres de vertus nous parle de ceste vertu car il ne dit pas en sa ruille, "Boneüré sont cil qui equité tiennent partout et en toutes choses ont discretion et mesure sanz mesprendre," car la n'aurions nous gueres gaaingnié que il n'est nul qui ne mespreigne moult de fois et en moult de manieres, et pour ce nous confortes doucement nostre tres douz Mestre, nostre Seigneur Jhesucrist quant il ne dit pas, "Boneüré sont cil qui ne pechent ne qui ne mesprennent ainz font tout par equité et par droite ligne"; mes il dit moult courtoisement pour

conforter les pecheurs, "Boneüré sont cil qui pleurent car il seront conforté."² Ce est a dire cil sont boneüré qui voient entendement et cognoissent bien leurs defautes et leurs mespresures en tous les poins d'equité que nous avons ci dessus nonmez et de ce pleurent et sont dolent que il truevent tant souvent iniquité la ou il doivent trouver, tenir, et garder equité. Car pour ce est le monde appelé vallée de lermes et de pleurs que nuls ne puet en ceste monde vivre sanz lermes et sanz tribulation. Qui ait le monde receü de science dont nous avons parlé; ainz convient si comme dit Salomon, que qui plus set et plus voit les maus et les douleurs du monde plus a grant duel et grant douleur a son cuer et lermes et pleurs et angoisses aussi. Comme cis mondes doit ennuier et comme plus annuie ceste vie, plus desire l'en l'autre, et de ce renaissent autres lermes pour le desirier de l'autre vie. Ore doiz tu donc ci penser et trouver siz manieres de lermes que li saint homme ont en cestui siecle pour le don de science.

Les premieres viennent de ce que l'en voit que l'en a Dieu moult de fois couroucié par pensee, par parole, par oevre, et par fait. Les secondees viennent des grans tourmens d'enfer horribles et pardurables dont chascuns doit avoir grant hydour et grant paour. Les tierces lermes naissent des maus et des paines que il voient souffrir aus bons. Les quartes lermes viennent des pechiez et des

51
AN

mauvaises oevres que les mauvés font. Les quintes lermes pour ce que l'en est tant en ceste mortel vie qui ennuie et pour l'autre bonneüree vie qui tant demeure et delaye. Les siziemes lermes viennent de devotion et de grant plen-té de joie de la presence de Jhesucrist et du sentement du Saint Esperit. Cil sont a droit bonneüré qui a droit pleurent car il seront conforté, si comme dit l'Escripture. Aussi comme la norrice conforté l'enfant qui pleure car elle li essuye les yex et le baise et le fait rire a force, aussi fera nostre Sires a ceuls qui pleurent en cest siecle, si comme j'ai dit devant, car il leur essuiera les yex que jamés ne plorront ne ne sentiront mal ne douleur, mes tous jours avecques Dieu en pais, en ris, et en joie pardurable seront.

DES DONS ET DES VERTUS QUI LE MONDE DESPISENT

Ore avons parlé des dons et des vertus qui gouvernent ceus qui ou monde vivent el plus bas de trois estas dont nous avons pieça parlé. Ore devons nous en l'aide du Saint Esperit parler des dons et des vertus qui plus proprement appartiennent a ceuls qui le monde despisenet et a la montaigne haute de perfection tendent. De ceuls dit proprement Job, que vie d'omme sur terre est comme chevalerie, car vie d'omme sus terre est comme bourjoisie. Ore regarde un jone bourjois et un jone chevalier nouvel. Moult ont cil dui pensees diverses et diverses baeries. Li bourjois pense a marcheander et a gaaingnier et a amasser, et a la fin de s'entencion est toute a ce que il soit riches et mueblé et en sa vie honnourez. Li chevaliers nouviaus si reva toute autre voie, car il bee a faire courtoisie et largement donner et chevalerie emprendre et aus armes aler mal souffrir et prouesce moustrer, los conquerre et en haut estat monter. Ces deus estas nous voions apertement en deus manieres de gens. Dont les uns sont qui bien se vuelent des grans pechiez garder, penitances faire, et aumosnes donner, tenir et garder les commandemens de Dieu et de sainte Eglise et bien leur souffisoit, se il se pouoient en la fin pour tant sauver. Cil sont en bon estat et bien se pueent sauver. Les

autres sont a qui li mondes ennuie pour les perils et les pechiez et les paines dont il est plains si que nuls ni puet avoir ne pais de cuer ne conscience savouree. Il voient d'autre part que il n'est nul tresor qui a l'amour de Dieu se puist comparer. Il n'est nulle douceur si grant comme pais de cuer, ne il n'est nulle gloire mondaine qui se puist comparer a la gloire de pure conscience; si leur samble bien et voirs est que qui ces trois choses porroit conquerre, il seroit plus grans que emperes. Mes c'est si grant chose que pou y a de ceus qui osent ceste emprise emprendre, mes quant Diex donne a l'ome ceste grace, celui don que l'en appelle le don de force, il li donne un cuer nouvel, noble, et hardi -- noble pour despire quanque li mondes puet promettre et donner, et de ceste hardiesce parle nostre Sires en l'Evangille quant il dit que bonneüré sont cil qui ont faim et soif de justice. Salomon dit que cil qui est justes, qui despit son domage pour son ami, c'est pour son Dieu qui est li drois amis. Et saint Bernart si dit que cil n'est pas justes qui ne voit en son cuer et sent et entent que il est grant douceur envers Dieu de lui amer sur toute riens. Cil qui vraiment desirre de tout son cuer a rendre ceste debte a Dieu, cil est debteur, dont nostre Sires en l'Evangille quant il dit que bonneüré sont cil qui ont fain et soif de justice.

Il ne dit pas boneüré sont cil qui ont ou font justice,
mes qui ont fain et soif, car ceste justice ne puet estre
retenue, ne ceste debte ne puet estre plainement rendue en
cest siecle et en l'autre paiee. Pour ce ne dit pas nostre
bon Mestre cil sont boneüré qui cest justice feront et qui
cest debte rendront. Ainçoiz dit plus courtoisement comme
Cil qui set nostre povreté, boneüré sont cil qui de cest
justice ont fain et soif. Car Il ne requiert pas que nous
li rendons a sa debte. Ainz li souffist se nous avons
bonne volenté et desirrier du rendre. Et comment dirai
que cil sont justes qui ne rendent ce que il doivent, ne
volenté n'en ont ne fain du rendre? Cil desirriers quant
il est vrais ou cuer il couvient que il se moustre par
oevre, car si comme dit Salomon, "Nuls ne puet le feu en
son sain repondre que sa robe n'arde."¹ Ceste moustre ne
puet estre sanz vertu et sanz prouesce , car par tesmoing
ne par pledier ne par prueve l'en n'a pas que l'en soit
bons chevaliers mes par faire d'armes et par moult souffrir
et endurer. Et ce est la quarte vertu que li Sains Esperis
donne pour estre perdu du tout en tout. Le quart vice est
le pechié d'accide et de peresce. Ceste vertu est de si
grant dignité que en toutes les autres vertus ceste seule
par soi emporte proprement le non de vertu, car vertu et
prouesce est tout un. Ceste vertu donne Diex a ses

sergens quant il les deigne faire chevaliers comme il fist ses apostres a Penthecouste des quels nous lisons que il estoient si couart que il n'osoient issir hors de leur ostels jusques a tant que il furent de tel vertu armez. Mes puis il aloient menant joie quant il furent de ceste vertu armez. L'en leur faisoit honte et durté.

Des sept degrez de force

Li philosoph qui des vertus traitierent, deviserent ceste vertu en sept degrez par illec ou ceste vertu monte et proufite, mes nostre Mestre Jhesucrist qui fist les philcsophes et la philosophie met le septieme point. Le premier point il apele le magnanimité; le secont, fiance; le tiers, seûrté; le quart, pascience; le quingt, constance; le sizieme, magnificence; le septieme est celui que nostre Sires y ajouste qui a a non fain et soit de justice. Ces vertus l'en ne puet pas si proprement nommer comme li entendemens de ces mos le dit en latin.

Magnanimité est haute grandesce et noble de courage par quoi li homs est hardis comme lyons et de grant emprise. Ceste vertu a deus parties; grans choses despire, et plus grant emprise emprendre et eslire.

De la premiere partie dit saint Augustin, prouesce est et grant courage despit quanque en son pouoir n'est mie

c'est quanque il puet perdre maugré sien; et Seneques dit es choses mondaines, "Mondaines riens n'est grant fors cuer qui grans choses despit."

De la seconde partie dit li philosophes, que magnanimité est resonable emprise de hautes choses et espoentables. Qui ceste vertu a il regarde le monde de loing comme dit Ysayes le prophetes, et aussi li samble tous li mondes petis comme une estoile samble a nous. Dont tous li mondes et toutes les cures et les grans besoingnes du monde li samblent aussi comme vent ou comme toile d'yraigné, dont Salomon dit quant il ot tout le monde reversé et tous les estas des fols et des sages desputé, et dit la sentence, "Vanité, vanité, quanque je voi est vanité,"^l c'est a dire tous li mondes est vanité et si est tout plain de vanité. Si comme dit li Sautiers: vanité pour mortalité que sa vie s'en fuit comme ombres; vanité pour curiosité que tels cures sont aussi comme songes; vanité pour iniquité car pechié le fait plus noiant que chose qui soit ou monde. Ore est dont la premiere partie de vertu, que elle fait le monde despire, si comme ont fait ça en arriere li philosophe païen et li saint home Crestien.

L'autre partie est que elle fait la voie de perfection emprendre et la vie qui tant apert, aspre et espoentable a eslire. C'est la voie qui maine a la

montaigne Dieu, c'est en la voie de perfection, c'est l'estat de conseuls privez nostre Seigneur que il moustra a ses apostres en la montaigne dont cis traitiez parle. Ceste voie eslisent cil et celles a qui il ne souffist pas garder les commandemens de Dieu a quoi il sont tenus. Ainz vuelent accomplir les conseuls a quoi il ne sont mie tenus par debte comme cil qui lessent quanque il ont pour Dieu et s'abandonnent a morir pour l'amour de celui qui morut pour eulz ou en la terre, d'outremer ou ailleurs, et comme font ceuls qui guerpissent et despisent tout pour Dieu seulement, et avoir et amis et euls meismes se font sers d'autrui qui estoient frans, et se font povres qui estoient riches ou povoient estre. Et se mettent a souffrir grans aspresces qui orent au monde grans delices, comme font maint qui sont en religion et de cuer et de cors, car pou vaut estre en religion ou en asprece de penitance se le cuer n'i est. Car li abis ne fait pas le moine, ne ne les armes le chevalier, mes li bons cuers et la proesce des oevres.

Le secont degré de ceste vertu est fiance, car a bonne voie emprise il convient que il tieigne fermement son propos et que il ait bonne fiance en Dieu que il parfera ce que il en commencera. Ceste vertu que il appelle fiance est trop necessaire contre les assaus du monde et

de la char et des dyables, qui plus forment assaillent l'omme au commencement. La char li dit, "Je ne porroie ceste vie demener ne endurer ne mes mauveses coustumes lessier." Et li mondes court après pour lui retraire aussi comme l'en court après un larron quant il eschape de prison. Li dyables li dit, "Chetis, que veus tu faire. Pourquoi te veus tu tuer? Tu te pues bien autrement sauver." Ce sont les premiers assaus que li nouviaus chevaliers de Dieu sueffre, qui bee le royaume du ciel conquerre; mes quant il s'affirme en Dieu par bonne et ferme finance il n'a garde. C'est li tres loyaus amis qui set et puet et vaut et siens garder, et qui Diex veut aidier; nuls ne li puet nuire.

Le tiers degré de force est seûrté, si comme dit li phylosophes, et est une vertu par la quele l'en ne redoute point les maus ne les perils qui sont devant les yex, et c'est li tiers biens que li dons de force fait. Car li Sains Esperis quant il a armé son chevalier de sa vertu, premierement, il li donne noble cuer de grans choses emprendre. Après, il li donne une grant ardeur et un grant desirier de poursuivre et grant fiance de l'achever. Après, il le fait seûr comme lyon si que il n'a paour de nul perril ne de paines de mort ne de tormens; ainz les desirre aussi comme li nouviaus chevaliers les tournoiemens. Ainsi faisoient li martir si comme il apert en leurs vies dont

nous lisons de sainte Agace, que elle aloit a aussi grant joie aus tormens, comme s'elle alast a feste ou aus noces.

Aussi comme li Sains Esperis fait seur pour attendre les tormens et les doleurs qui sont avenir, aussi le fait il fort et pacient a souffrir les temptacions quant elles viennent; et c'est le quart degré que il appellent pacience. Par ceste vertu vaint li homs tous ses anemis, li dyables, l'assaut, et le monde, et quanque il puet faire ne dire. Que c'est li escus d'or a celui qui pour l'amour de Dieu sueffre que il le cuevre de toutes pars, comme il dit ou Sautier, si que nuls cops ne le puet grever ne nuire. Ceste vertu n'a nul fil s'il n'a esté temptez, car tribulation forge pacience. Ce dit saint Pol; aussi comme le feu la tieulle dure, sanz ceste vertu nuls ne puet esprover, ne que li ors puet estre sanz feu affinez. Sanz pacience nuls ne vient a perfection; sanz pascience nuls n'a victoire, car qui pacience pert il est vaincus. De ce veons nous essample a tous ces mestiers que l'en fait aus mains: moult sueffre de feu et de cops la coupe d'or ançoiz que elle soit mise a la table le roy, et li calices ançoiz que il soit beneiz ne mis a l'autel; moult sueffre li tonniaus de grans cops ançois que l'en y mette de bon vin; moult est defoulee aus piez des foulons la robe d'escarlate ançoiz que li roys la veste; et a ce pues tu trouver autant d'essamples comme il

a menestrels a Paris de mestiers. Par ceste vertu est li homs fors comme li fers qui tous les metaus donte, et precieus comme li ors qui con plus est ou feu plus est purs et cleris et tretables comme la salemande qui vit ou feu et comme li poissons qui en l'yaue se baigne et norrist.

Le quint degré de ceste vertu est appelee constance. C'est une vertu qui fait le cuer ferme en Dieu comme tour fondee sus ferme roche et comme arbre enraciné en ferme terre qui ne se crolle pour nul vent qui puist venter, c'est pour nulle aventure qui puist avenir ne bonne ne male. Sanz ceste vertu ne vient nuls a victoire car quant li chevaliers Dieu a fait un prouesce, lors l'assaut li dyables par vainne gloire et lors est la bataille ou cuer plus fort pour soi meisme vaincre que il ne chiee en vaine gloire que toute la temptation premiers ne fu. Dont David dit ou Sautier que li dyables abat bien les fors a senestre par adversité et les tres fors a destre par vaine gloire. Ceste vertu loe moult Seneques qui dit que il n'est vertu fors celle qui s'en va avant orgueil entre l'une fortune et l'autre, c'est entre la bonne et la male et a grant despit de l'une et de l'autre.

Le sizieme degré de force est appelé magnificence. Ceste vertu il la descrivent ainsi; magnificence, font il, est de haute besoingne, bonne oevre de chevalerie. Ceste vertu nostre grant philosophhe Jhesucrist apele perseverance

par la quale li bons chevaliers Dieu endure les maus et pardure jusques en la fin en la haute joie de perfection que il a emprise. De ceste vertu dit saint Pol que toutes les vertus courrent, mes ceste gaigne l'espee; toutes se combatent, mes ceste a la victoire et la couronne; toutes oeuvrent, mes ceste emporte le loier au vespre. Qui perseverera jusques en la fin il sera sauf et nuls autres. Plus avant ne sorent li philosophes la vertu de prouesse mener, mes li deciples nostre mestre Jhesucrist volt plus assez aler. Car si comme dit Salomon,² quant il ot tout asommé donques primes leur samble il que tout soit a recommencier. La vertu et la prouesse des philosophes estoit toutes pour les vices vaincre et les vertus acquerre et avec tout ce principaument pour tenir justice et loyauté envers nostre pere Jhesucrist. Cil n'est mie juste qui ne rent ce que il doit a son povoир, et autant comme il vaut miex de moi au tant li sui je redevables par droite justice, si comme dit sains Ansiaumes. Ceste justice je puis desirrier, mes je ne autres ne la porroit ci rendre ne plainement paier, comme nous avons dit devant.

Et pour ce que li septismes degrez de ceste vertu que nostre mestre Jhesucrist y adjouste a quoi li philosophes ne se porrent acorder, et quant il dit "Bonneuré sont cil qui ont fain et soif et grant desirier de justice," de

septieme degré et a leur povoir monter en cest arbre.

En ceste arbre aussi comme es autres nous trouvons sept branches, car en sept manieres la vertu et la prouesse du bon chevalier se moustre, car par sept manieres de batailles il vient en sept victoires de sept couronnes. Ce sont sept loyers, dont saint Jehans parle en l'Apocalipse; car si comme dit saint Bernart, moult est fol et surcuidié qui, sanz victoire attent a avoir couronne et qui, sans bataille, cuide avoir victoire. Dont saint Pol dit que ja a couronne ne vendra qui loiaument ne se combatra, c'est a dire, selonc la loy du champ de l'esprueve qui souloit estre³ tele anciennement a Romme, que cil qui ou champ se mettoit pour los conquerre vainqueist tous ceuls que li mestres du champ . . .⁴ C'est Jhesucrist, qui esprueve ses nouviaus chevaliers si comme il apert escript ou Livre des roys.⁵ Oils mestres est tres loyaus, comme dit saint Pol, et set bien le povoir de chascun, dont il ne sueffre que nuls naemis nous tempte outre nostre povoir ne que nul adversaire nous assaille que nous ne puissions vaincre se nous voulons aide de celui, qui enz en la bataille nous acroist nostre force, si comme dient saint Pol et saint Jehans. Si comme nous avons dit et devisé en sept victoires et sept couronnes, c'est a dire sept manieres de loiers que Diex promet a ceuls qui vaincront.

La premiere bataille que li Crestiens a est contre

pechié mortel. En ceste bataille nuls n'est vaincus se il ne veult, car qui ne se veult consentir il veult la bataille qui est moult legiere a vaincre au cuer viguereus et moult longue et rioteuse aus pereceus et aus accidieus qui sont tenu au service Dieu, qui ne sont bien froit par paour ne bien chaut⁶ en l'amour de Dieu, si comme dit saint Jehan. Cil qui chiet et qui est vaincu en ceste bataille a plus fort a faire de soi relever⁷ et de soi deffendre que cil qui est en estant, car il n'a povoir de soi relever⁸ se Diex ne li tent la main par grace. Car aussi comme li poissons qui entre par soi en la nasse mes issir n'en puet qui ne l'en gete; aussi li homs chiet par soi en pechié, mes il n'en puet issir ~~sanz~~ l'aide nostre Seigneur qui li done quant il li plest l'armeure de penitance par quoi il puet vaincre son adversaire; c'est l'armeure que saint Pol commande a prendre en ceste bataille, car homs desarmez ne vaut riens en bataille. Or doiz savoir que a ce que li homs soit bien armez pour vaincre pechié. Il convient que il ait trois choses qui sont en vraie penitance: la premiere chose est repentance de cuer; la seconde confession de bouche; la tierce si est souffisant amende par oevre. De ces trois choses est entamez li haubers de penitance. Se l'une de ces trois choses y faut, l'armeure est toute fausse et cil qui la porte vaincus.

Repentance requiert grant doleur et grans gemissemens

de cuer de ce que l'en a couroucié son Creatour, et con plus
l'en a couroucié, tant doit estre li duels plus grans. Ain-
si se repentoit li roys David comme il disoit ou Sautier,
"Je laboure et travaille en mon gemissement et laverai toute
la nuit mon lit et ma couche de mes lermes."⁹ Cil qui a
Dieu couroucié par pechié mortel, il doit gemir du parfont
du cuer, si que li cuers li fonde tous en lermes et a grans
pleurs et a grans souspire doit crier a Dieu merci, comme son
larron, son murtrier, son traiteur qui a desservi le gibet
d'enfer. Li pechierres est li lerres Dieu, car les biens son
Seigneur qui ne li sont que prestez pour gaignier, ce sont
les biens de nature, de grace, ou de fortune dont il li con-
vendra rendre conte et reson. Moult estroitement il les a
folement despendus et en mauvés usage et tous mis a un hasart.
Aprés, il est murtrier de la fille le roy, c'est de s'ame
meisme qui estoit fille Dieu par grace, il l'a occise par
pechié mortel. Aprés, il est traitres Dieu, car le chastel
de son cuer et de son cors que Diex li a baillié en garde il
a rendu a son anemi mortel, c'est au dyable. Bien doit
donques grant duel mener qui est en tel point et souvent de
ses lermes son lit laver, c'est sa conscience ou li serpens
venimens d'enfer s'est longuement geuz. Teles lermes chacent
le dyable hors du cuer comme l'yave chaude chace le chien
de la cuisine. Aprés, la repentance doit venir la confession,

c'est la bonne chamberiere qui netoie l'ostel et gete toute l'ordure hors au balai de la langue, dont David parle ou Sautier.

Ore entent bien comment l'en se doit confesser. A ce que la confession vaille au salut de l'ame il y convient siz¹⁰ conditions. La premiere si est que elle doit estre faite sagement et ceste est en deus manieres; la premiere est que l'en regarde a qui l'en se confesse. Saint Augustin dit que ce que l'en feroit pour la santé du cors et pour eschiever la mort corporele doit l'en faire pour eschiever la mort pardurable et pour avoir santé quiert volentiers le meilleur fisicien et le plus sage que il puet trouver. Aussi dit saint Augustin que cil qui se veut sagement confesser et grace vers Dieu trouver il doit querir ce confesseur qui sache lier et deslier, c'est a dire qui sache pechié cognoistre et le pecheur confesser et conseillier, et qui ait povoir de lui assoudre et de li penitance donner selonc le pechié, car selonc le pechié la penitance doit estre. Aprés cil qui sagement se veut confesser il doit diligament penser a ses pechiez avant que il vieigne a confession et tout son cuer cherchier et sa conscience comment il a Dieu et sa benoité chiere Mere et ses sains courouciez et a grant paour toute sa vie recorder, comme faisoit Ezechias qui disoit ainsi, "Je recorderai tous mes ans en grant amertume de cuer." Le

pecheour doit estre en son hostel, c'est en son cuer, non pas en trespassent comme le jongleour, qui ne demeure pas volentiers en son ostel, car il n'a pieur ostel du sien. Mes illuecques doit demourer et regarder toutes ses defautes de quoi il doit rendre compte et reson a Dieu et a son pre-vost, c'est a son confesseur, et doit penser a soi aussi comme cil qui est ajournez a compter ses receptes et ses mises par devant son seigneur, dont il doit diligament penser et regarder avant l'escript de sa conscience que il ne faille en son compte. Car se il faut a son compte Diex ne faudra pas au sien.

Quant l'en a diligament regardé a ses pechiez et comment et en quantes manieres l'en a Dieu couroucié et combien longuement l'en a demouré ou pechié, lors se doit l'en confesser tost et hastivement. Et c'est la seconde condition qui doit estre en confession. Li roys David se levoit des mie nuit pour soi confesser, si comme il dit ou Sautier, a envis attendist jusques a un mois ou jusques a demi an. Et li Sages en autre lieu en l'escripture dit: "Ne tarde pas a toi convertir a nostre Seigneur et ne quier pas alcoingnes ne fuites, et ne te delaie du tout en tout, car la demeure est trop perilleuse par moult de resons." Premierement pour la condition du pechié, car pechié est un feu ardant qui ne puet estre estaint fors par lermeuse confession. Certes

moult seroit fol qui verroit sa meson ardoir se il tantost
ne courroit a l'yaue. Après pechié si est moult grant mala-
die, et confession est la medicine, et certes pou prise
santé qui se voit malade a mort et ne desirre tost estre
gueriz. Après la mort qui est pres et qui par tout espie
doit esmouvoir le pecheur a soi tost confesser, car il ne
set ne le point ne l'eure ne le jour que la mort vendra qui
souvent souprent le pecheur la ou il ne se prent garde. Et
certes qui savroit a quel jour il morroit il se appareille-
roit au plus tost que il porroit. Après se le pecheour
veoit bien le pechié ou il est, il est en chartre de pechié,
en la gueule du lyon d'enfer et du dragon qui le vuelent de-
vourer, il crieroit a Dieu par confession au plus tost que
il porroit. Après se il veoit les grans biens que il a per-
dus par son pechié, c'est assavoir les biens pardurables et
les piens espirituels et soi meismes, qu'il puet tous jours
recouvrer par confession, moult seroit fol se il ne se has-
toit du recouvrer. Après la misericorde de Dieu que il
attent et boute a son huys, si comme dit l'Apocalipse, le
doit chastier. Car de tant comme Diex attent plus le pecheur
de tant le fier il plus cruelment, quant il le voit pereceus
et negligent, aussi comme li archiers de tant comme il en-
toise en son arc de tant fier il plus fort et plus cruel-
ment et plus forment. Et certes Diex a ja son arc tendu et

et entese, si comme dit li Sautiers, pour occire les pecheurs se il ne s'amendent. Aprés, cil qui se garde trop de soi confesser oublie souvent ses pechiez. Jamés ne li souvendra et ainsi jamés ne s'en rempetira si est moult grant pechié.

Aprés, quant il est devant le preste il se doit confesser entierement et apertement, c'est a dire, que il doit dire ses pechiez clerement si que le confesseur voie aperte-ment le cuer et l'entencion de celui qui se confesse. Et li malades doit descouvrir sa maladie au fisician; autrement il ne porroit ouvrir ne li surgiens ne peut ouvrir en la maladie, se il ne voit plaie ou autre maladie. Et pour ce dit Boeces li sages, que se tu veulz que li surgiens te guerisse, il te couvient moustrar la plaie. Donc les truans te doivent enseigner a confesser qui monstrent leur povreté et leur maladie et mettent le plus let avant pour avoir l'aumosne; et ainsi doit li pecheurs faire, car il doit moustrar sa maladie et descouvrir ses pechiez pour avoir misericorde et pardon. Ce est la tierce condition qui doit estre en confession.

Aprés, le pecheur se doit confesser enterinement, c'est la quarte condicion. Car il doit dire tous ses pechiez et granz et petitz et les circonstances des pechiez; dont il doit garder les sept pechiez mortiex, des quiez nous avons desus parlé, et enterinement confesser de chacun selonc ce

que l'en se sent coupable sanz riens celer et sans deffen-
dre et sanz autrui acuser. Ainsi se confessoit David qui
disoit ou Sautier, "Je me confesseray et dirai mon pechié
contre moy," il et non pas l'autrui ne contre autrui, comme
font li ypocrite qui metent le plus bel dehors qui rapportent
leur bien et leur mal responent, et acusent les autres de ce
donc il sont plus copable. Que il voient trop bien la buche
en autrui oeil et ne regardent pas le tref ou leur; telz
estoit le Pharisiens de l'Evangile qui regardoit ses biens
et despisoit le pecheeur qui humblement batoit sa cope ou
temple et se jugoit devant Dieu et crioit merci et disoit
sire Diex aiez merci de cest pechueurs. Ainsi se doit jugier
li pechierres devant Dieu, non pas aleger les pechiez, mes
engregier et peser sanz mentir. Aprés, confession doit estre
enterine non pas devisee a pluseurs. Car l'en doit dire
tout a un, non pas l'une partie a l'un et partie a l'autre.
Car Dieu n'a cure de tele metoierie. Aprés, l'en doit dire
non pas seulement les pechiez, mes les circonstances qui en-
greigent les pechiez, car le pechié est plus griez a une
personne que a une autre, comme en un home de religion que
en un seculer, en un prelat que en un plus bas homme, en un
grant seigneur que en un simple homme. Aprés c'est plus
grant pechié en un lieu que en autre comme en un moustier
ou en un autre saint lieu; aprés, en un temps que en autre